

205¹⁾ Fu posto, per sier Antonio Grimani procurator, sier Lunardo Mocenigo, sier Andrea Trivixan el cavalier savio dil Consejo, sier Piero Contarini savio a Terra ferma, essendo venuti li oratori di la fidelissima comunità di Brexa a la Signoria nostra, rechiedendo sia revocà la parte del raynes per cavallo a le taxe di le zente d'arme etc., atento è gran angaria a loro, pertanto sia levada, e tutti quelli vol pagar il raynes, pagi il raynes per cavallo, quelli far voleno come si soleva prima, fazi, *ut in parte*. A l'incontro, sier Antonio Trun procurator, sier Piero Capello savii dil Consejo, voleno star sul preso, et in questa è sier Pandolfo Morexini savio a Terra ferma. Una terza è di sier Piero da cha' da Pexaro, sier Marco Foscarei, sier Lorenzo Venier dottor savii a Terra ferma, atento le tanse sieno per cavalli, sia *solum* per 800; sichè verano esser aleviadi dil numero, et *tamen* pagino il raynes.

Andò in renga primo sier Pandolfo Morexini predito; li rispose sier Andrea Trivixan el cavalier. Poi parlò sier Piero da cha' da Pexaro per la loro opinion; poi sier Piero Capello; poi sier Andrea Trivixan el cavalier. *Iterum* poi sier Luca Trun cao di X, qual vol sia levata. Poi sier Antonio Trun procurator, *tamen* poi nulla volse meter. Poi sier Piero Contarini savio a Terra ferma, che più non ha parlato poi è intrà in Colegio. Poi sier Zuan Badoer dottor, cavalier, fo podestà a Brexa, sente sia levata. Andò le tre opinion sopra nominate: 3 di 3 Savii da Terra ferma, do di quali mete la balota; 26 di sier Piero Capello e sier Pandolfo Morexini star sul preso; . . . di altri Savii, et fu presa. Et sier Antonio Trun procurator nulla volse meter.

Fu posto, per sier Francesco Foscarei, sier Nicolò Venier, sier Sebastian Moro e sier Hironimo da Pexaro consieri, sier Daniel Barbaro e sier Zuan Antonio Memo Cai di XL, e li Savii, una parte di contumacia, in ordene assa' bello. A l'incontro, sier Andrea Baxadona consier vol tutti habbi contumacia, niun da esser exepuado. Et visto cussi, li Savii tolse rispetto a consultarla meio.

In questa sera, se intese el Doxe star meglio et esser senza febre.

Fo mandato li sumarii di queste nove aute di Corphù, a Roma, Franza, Spagna, Milan et Hon-garia.

A dì 17. La matina se intese el Doxe aver di la febre, et ha auto inquieta note; sichè va scorando.

Di sier Zuan Moro capitano di le galie di Fiandra fo letere, di 16 Dezembrio. Dil suo zonzar a l'isola, *videlicet* a di 13, in Antona. Scrive il suo navegar, et altre particolarità, *ut in litteris*.

Da poi disnar, fo Colegio di Savii per aldir li X Savii zereha l'estimo di Padoa, intervenendo li venetiani.

Di Franza, fo letere di sier Antonio Justinian dottor, cavalier, da Cognaco, di 5 di questo; et di Spagna, di sier Francesco Corner el cavalier, orator nostro, date a Burgos a di 27; et di Milan dil Secretario.

In questo zorno, a vespero, comenzò il perdon di colpa e di pena, auto da questo Pontifice, in la ehiesia di San Zuminian in cao di Piazza per il fabbricar di la chiesia; dura per tutto doman.

A dì 18, *Domenega*. Se intese el Doxe stava meglio; sichè non ha mal. Fu leto le letere di Franza, qual scrive di la conclusion di lo abochamento di quel Re col re di Anglia; e altre particolarità.

Di Spagna. Come il Re partiva subito, va verso San Giacomo di Galicia per imbarcarsi e passar in Fiandra, era lontan mia 40; sichè accelerava il camin suo. Scrive ricevuta di nostre, di 14 Fevver, cercha volersi ben intender con la Signoria nostra, et che monsignor di Chievers e il Re, udita la risposta dil Senato, si risentì alquanto. Poi intrato su le petizion fevano li soi agenti in Verona, disseno questa commission non avevano; et che l' Re era di constante animo di perseverar in la trieva; con altre parole, *ut patet*.

Da poi disnar, fo Gran Consejo. Fato nove voxe, tutte passoe, et rimase: di Pregadi sier Nicolò Lion, fo di la Zonta, qu. sier Jacomo, che va con una erozola, qual rimase, per esser andato con homeni a Padoa, di la Zonta ordinaria una volta, et dil suo par habbi di novo refato il campaniel di Santa Marina in la forma l'è al presente; il qual però passò di do balote: ave 722, 718. Fu tolto XL Criminal sier Zuan Corner qu. sier Antonio, che lezeva in philosophia, e per le parte la Signoria terminò non si provasse, e non fu balotato.

A dì 19, fo San Joseph, e si varda per la tera da poco tempo in qua con gran devutione. Fo *letere di Roma, di l'Orator nostro, di 15*. Come l'era stato col Papa e coluquii auti insieme. L'ha dito aver di Franza, come si abocherà con il re d'Ingaltera. *Item*, che lo episcopo di Pistoia, tornato da sguizari, li ha dito che sguizari è ben disposti esser con Sua Beatitudine; ma dicono loro do soli non havendo un terzo non potranno resister, non speci-

(1) La carta 204^a è bianca.